




*Kamis, 15 Maret 2023*

**Ogen: Rut 4:1-12**



*Hak Nukur Tanah*



**G**o'el, istilah bahasa Jahudi ertina menebus. Adi lit perbulangen kalak Jahudi idilo Dibata, maka si biak seninana arus nukur taneh si kerajangen si mate e ras ndeharana. Gelah tetap lit hak keturunan si mate ndube i bas keluargana nari. Bage me kegeluhen Naomi si ndube erlajang ku taneh Moap ras isi jabuna. Sura-surana gelah puluh i bas perbeben kiniseran i kutana. So niarap, i Moap mate perbulangenna ras pe duana anakna, tading me ia ras dua kalak diberu Moap si jadi permenna. Megogo kal atena. Labo serpang puluh si idatna tapi kiniseran si ertindih-tindih. Kecibal Naomi enda adi i bas kalak Jahudi, diberu balu si lanai lit hakna i bas keluarga perbulangenna nari. Taneh ras erta si lit ndube kerina jadi hak keluargana, la lit kai pe si jadi sekerajangenna. Tading ia ras permenna si Rut mulih ku kutana Betlehem. Lanai ersima-sima, taneh si man perjumanna pe la lit.

Rikutken adat kalak Jahudi, banci denga mulih juma e man Naomi adi ia lit sinebussa. Pihak keluarga terdekat si wajib nebussa. Tangka naomi aturen si e, e maka isuruhna Rut erdahin i juma Boas, gelah ieteh Boas ise Rut enda. Boas meteh aturen ise si arus nebusi Naomi ras Rut. E maka labo ipedekah-dekah Boas, minter ijumpaina si biak senina Elimelek perbulangen Naomi ndube. Irunggukenna uga gelah Naomi itebus, gelah mulihken hak keturunenna. Si biak senina Elimelek e nggit adi terjeng nukur taneh, tapi nebusi Rut ras Naomi la meriah ukurna sabab adi iempoina Rut, taneh si itukurna e labo jadi man bana, tapi man keturunan Elimelek ndube. Erkiteken si e itangtangina sepatuna, iberekenna man Boas. E tandana hak na guna nukur taneh e iendeskenna man Boas. Selaku kalak si erkeleng ate, Boas ngaloken hak enda janah nggit pe nebusi Rut rs Naomi. E maka erta Elimelek ndube tetap jadi sikerajangen sinursurna.

Payo lit ak nukur taneh, tapi perlu kepe si eteh kuja kegunan nukur taneh e. Labo terjeng nambahi kinibayaken tapi nambahi kejuah-juahen kalak sideban.

*➤ nukur taneh nambahi kejuah-juahen kalak si deban*